

## **Ukiumut aningaasaqarfiusumut 2013-imut ilassutitut aningaasaliissutissanut inatsisissatut siunnersuut**

(Aningaasaqarnermut Nunamullu Namminermut Naalakkersuisoq)

### **Akissuteqaat**

(Aningaasaqarnermut Nunamullu Namminermut Naalakkersuisoq)

### **Aappassaaneerneqarnera**

2013-imut ilassutitut aningaasaliissutissanut inatsisissatut siunnersuutip siullermeerneqarnerata kingorna ataatsimiititaliami oqaluuserineqarnera pillugu Aningaasaqarnermut Akileraartarnermullu ataatsmiititaliaq qutsavigissavara. Aningaasaqarnermut Akileraartarnermullu ataatsimiititaliap isumaliuutissiissutaani pineqartuni immikkoortut ataasiakkaarlugit oqaaseqarfigissavakka.

Naalakkersuisut Inatsisartunut aammalu Aningaasaqarnermut Akileraartarnermullu ataatsimiititaliamut missingersuutinik ilisimatitsissuteqartarnerinut tunngatillugu taakku siunissami suliarineqartarnissaat Aningaasaqarnermut Akileraartarnermullu ataatsimiititaliap naatsorsuutigaa. Tamanna 2013-imi pisimangilaq. Missingersuutinik ilisimatitsissutit siunissami ukiumut marloriarlugit ingerlateqqinneqartarnissaat Naalakkersuisut naatsorsuutigaa, tamannalu aprilip aggustillu qaammataanni naatsorsuutit naammassinnerisa kingorna pisassalluni.

Aningaasaqarnermut Akileraartarnermullu ataatsimiititaliap isumaliuutissiissutaa tunngavigalugu ersarissorinarpoq, missingersuusiornermut aalajangersakkat aammalu missingersuutinut inatsit atuuttut ilisimasaqarfigineri tamanut tunngatillugu naammangitsut. Tamanna ilassutitut aningaasaliissutinik sulianik naapertuutinngitsumik suliarinnitsitsisarpoq, tamannalu kimulluunniit naapertuutinngilaq. Uparuaaneq Naalakkersuisut tusaatissatut tiguaat taavalu Namminersorlutik Oqartussani sulisut, ilassutitut aningaasaliissutissanik suliaqartartut imaluunniit taakkuninnga tusarniaassutinik akissuteqartartut tamarmiusut missingersuusiornermut aalajangersakkat aamma missingersuutinut inatsisip atuuttut imarisaannik ilisimasaqarnissaat pillugu Aningaasaqarnermut Nunamullu Namminermut Naalakkersuisoqarfik aallarniuteqarnissaanik piumaffigissallugu.

KNR-ip illutai, oqoqalersimanagerini utaqqiisaasumik nutsernissamik pisariaqartitsilersimasoq pillugu malinnaasunik paasissutissiinissaq isumaliuutissiissummi qinnutigineqarpoq. Tamanna pillugu Naalakkersuisut ilisimatitsissutigisinnaavaat, ukiumoortumik naatsorsuutinik aammalu suliat naatsorsuutaannik inaarutaasunik allannerup matuma nalaani Naalakkersuisut KNR-imit tigusaqanngitsut. Taakku maajip naanera sioqqullugu tiguisimanissaat Naalakkersuisut naatsorsuutigaa. Nuunnermut aningaasaliissutit

naammassorinartut KNR-ip ingerlaavartumik nalunaarutigisarpaa. 2013 pillugu naatsorsuutit tigunerini tassunga tunngasut Naalakkersuisut eqqumaffigissavaat.

Sulianut kisitsisinut tunngatillugu KNR-ip ilisimatitsissutigaa, nutsernerup nalaani ulapaarnermi pingaartumik Qanorooq naalisaaffigineqarsinnaassasoq. Naalakkersuisut tamanna paasisinnaavaat, kisianni ingerlaavartumik nalunaarutigisarlugu, nutsernerup isiginnaartartunut tusarnaartartunullu malitsissai ajortut minnerpaaffimmiitinniarneqassasut.. KNR-ip TV-mut aallakaatitsisarfitik aatsaat 2014-imi nutserlugit naammassivai, taamaattumik aningaasatigut malitsissaasut 2013 pillugit ukiumoortumik naatsorsuutini aamma ukiumoortumik nalunaarusiornermi allassimassanngillat.

KNR-imit ukiumoortumik nalunaarusiaq aamma ukiumoortumik naatsorsuutit saqqummiunneqarpata ilisimatitsissut Naalakkersuisut Aningaasaqarnermut Akileraartarnermullu ataatsimiititaliamut ingerlateqqissavaa. KNR-imut siunissami illu eqqarsaatigalugu, taanna sulii pilersarusiorneqarpoq, tassani periarfissat inissisimaffissallu arlaqartut toqqagassaallutik. Taamaattumik KNR-imut siunissami sanaartukkanut tunngasut Naalakkersuisut maannakkut sukumiinerusumik ilisimatitsissutigisinnaanngilaat.

Aningaasaqarnermut Akileraartarnermullu ataatsimiititaliap isumaliuutissiissummi nalunaarutigaa, kommunini qineqqusaarnermut tapiissutissanut ilassutitut aningaasaliissutissanik qinnuteqaatit ingerlateqqinneqartut marluk missingersuutininut inatsisip imaanut akerliusut, pissutsinnut aningaasanut inatsisiliornermi akuersissuteqarnermilu siulittuutigineqarsinnaanngitsunut taamaallaat aningaasaliissutissanik qinnuteqartoqarsinnaammat. Ilassutitut aningaasaliissutissanik qinnuteqaatit taakku marluusut 2013-imi februaarimi aamma septembarimi taamanikkut maannakkullu Naalakkersuisuusunit ingerlateqqinneqarput. Tamassuma uteqqinneqarnissaa Naalakkersuisut naatsorsuutiginnilaat.

Taamatut oqaaseqaateqarnikkut Ukiumut aningaasaqarfiusumut 2013-imut ilassutitut aningaasaliissutissanut inatsisissatut Naalakkersuisut siunnersuutaat Inatsisartunut kajumittumik oqaluuserisassanngortippara pingajussaanillu oqaluuserinissaanut qilanaarlunga.